

鈴

山

堂

集

鈺山堂集卷第二十七目錄

雜記

北上志

西使志

東觀雜志

南省志

內館志

鈴山堂集卷第三十七

雜記

北上志

予卧病鈴山閱八稔正德丙子春三月疾愈治裝將  
如京師前期文告先墓廿有五日啓行時郡守  
徐侯連縣令蕭侯時賓戒舟爲送是日晨雨如注午  
雨少歇登舟縣寮屬暨親友暨家族長少咸餞于航  
江之亭始去鄉邑有離別惘惘之思焉二十六日早  
發雲日澄朗江流盛漲風順舟駛午次白漢舅氏庄  
宿別二十七日過楊津訪宗羅諸姻楚蒙侍御以舟

來逆至新喻士友雜沓來訪留二日是日立夏驟暄  
詰旦風橫作更復寒凜舟行二十里次嚴家渡憇焉  
晡時風息楚蒙舟送至此乃別晚行二十里宿安和  
三十日過羅溪訪同年胡子明秋官宅午次劉家陂  
易氏親邀餞陸行十五里至其家四月朔日還舟風  
阻泊泗溪二日初三日次臨江奚二守鉞傳侍御冠  
卿黃大參文繡孫太守朝望李大尹文振符進士宜  
臣會餞于瀟灘驛風雨淒橫留二宿初六日風順過  
豐城晚晴至曲江登江天閣有李子獻吉刻詩觀之  
初七日過市汭驛至南浦驛都憲孫公璣方伯張公

漢王公啓方大參璘羅少參中胡憲副銓王憲  
鄭戶部玉蔣工部愷以次來訪且詣府朝有燕  
飯于同年勤甫田公提學分司十三日早發謝貢士  
應和裘秀才舁舟送至雙港楊樹湖田舍距城二十  
里矣午次趙家隈舟人謂候曉乃可踰湖遂止宿焉  
十四日曉行湖中並湖多洲洲間生青篋長數寸舟  
人競採之淹爲殖絕香美自此挽舟逆流至鄔子驛  
過余家埠岸傍古樹青茂連陰數里清流映帶可愛  
晚宿烏江口十五日次龍津驛即餘干河口憲副許  
公本謙司允運於此來訪晚宿黃丘舖十六日次安

仁湍水淺涸易小舟行十里至石港宿十七日次貴  
溪十八日次弋陽方伯安福伍公朝信時赴閩任聯  
舟行是日過石潭汪氏里第同年有之貢士邀伍公  
與予觴于第二十日過叫巖寺艤舟觀之寺鑿巖而  
屋巖石壁立由寺西扳磴盤折而上甚峻後枕崇岡  
爲汪氏先塋踰嶺而北爲閣老費公家塋一大山下  
支嶺蜿蜒出田畝間爲高都憲家塋皆往觀之諸山  
起伏奔躍峯巒特秀大山逶迤徑巖麓停洄而去有  
石起江心俗名捲續石信天設奇勝也有之送予至  
此而別自此行十里江畔有樓名嘉會乃閣老費公

里第登岸尋徑謁公欸語抵暮乃還舟二十一日次鉛山河口伍公自此登陸之鉛山入閩與予別二十二日次廣信費太史子和李侍御子芳偕會時旱涸議當陸行予見四山雲合若將雨狀索小舟旦發小雨行三里野泊雨終夕翌日抵懷玉矣因歎人事通塞不可料如此同年曹端卿二守方旱禱憂惕遣詩慰之二十四日憇玉山館是日離家一月矣二十五日過山微雨頗涼道中青苗遍野時時徑松林間陰蔚可愛飯草坪驛未刻至常山錢令憲來迂生員胡鑑遠遙來見二十六日登舟南行五十里至板巖宿

二十七日風順辰至衢州與鄺守璠會驛下遂飲同年劉太守彥明郡齋二十八日經龍游縣至蘭谿縣連日析數小舟行沙浦間此縣江水稍深行有官艦頗鉅載之晨謁章楓山先生乃行晚次富春驛五月初一日四鼓發舟風順經七里灘望嚴陵釣臺過桐廬縣晚抵富陽縣初二日渡錢塘江憇浙江驛舟載家具入水關予陸行入鳳山門至城中館于市民金廷秀家內監王堂晁進桂珤侍御鮮巡按冕趙巡鹽春林戶部大輅方伯任公鑑湯公沐大參藩公鐸周公曾少參楊公漑憲使李公承勛憲副馬公卿憲僉



許公謨胡公訓都聞陳君著張君淮申君楊守梁  
君才運使吳君大有皆來訪始食黃魚即石首燕也  
鮮時其色如金初五日陳都帥番遊子與戴刑部時  
宗林饒州城爲泛滿之集同年謝太史以中寓南關  
外訪之翌日三司請公招飲三節觀予辭不赴旦出  
城次吳山驛登舟初七日早食發舟次塘西宿初八  
日過崇德縣縣令洪異廣人治縣有稱初九日早次  
嘉興取道如松江訪三汀陸太史雨行夜至嘉善縣  
初十日微雨晚抵松十一日侯二守景德邀集棠蔭  
書院復集同年陶員外良伯第十二日同年丁別駕

文範以舟至唐橋宴別夜分抵上海縣境遲明至浦  
東陸文吏里第去縣治尚三里同年宋戶部義卿督  
稅于此越江來會有鄞士碧谿張鈇能詩同集是日  
風雨坐覺凜肅乃知海國夏寒如此十四日早渡江  
入上海縣訪諸舊識遂行義卿舟送三十里至龍華  
寺宴別夜行月色如晝四鼓泊松城下三汀碧溪二  
君送予至此而別郡僚暨孫太史徵甫張給舍時行  
吳工部子儀及良伯諸君偕餞于問俗亭下良伯又  
餞而前晚宿魏塘十七日還至嘉興李太守道甫劉  
二守應徵夜餞于驛十八日午發次黃江涇十九日

雷雨早過平望驛過吳江縣晚至蘇城外胥門驛同年孫侍御夔卿徐郡伯朝儀遣義官吳完來治舟謝工部廷瑞顏二守如瓌李吳縣經沈方伯良臣各來訪少傅守溪王公里第有怡老園山池甚勝招予飲徐公招餞于鶴山書院顏二守餞于州宅留凡五日以待舟故二十六日過楓橋學士陳子雨先生宅遂至許市王戶部謬來訪連日溽暑如焚晚雨困暍稍紓二十七日過望亭晚次無錫謁二泉邵先生二十八日次常州同年徐侍御子謙適清戎至餞于毘陵驛是日小暑節二十九日次丹陽三十日過同年許

補之侍御宅晚至鎮江六月初一日風靜渡江波平如鏡予拏小舟獨遊金山登留雲吞海之亭坐聽潮軒中僧饋蔬食酌中冷泉淪信茗飲之風味殊絕還舟至瓜步初二日次揚州都憲藍公章王侍御金江主事淳皆來訪初四日易親可範邀飲于觀音堂巷之寓舍是日與嶽弟別過邵伯驛夜行湖中大雷電以風初五日辰過高郵晚泊槐角樓鎮濱湖石岸陡峻風雨橫作舟震盪衝擊與石鬪兩宿皆值惡境情甚湮鬱夜分雨止風息天明順風踰湖二十里抵寶應初六日午至淮陰驛總漕都憲叢公蘭鎮遠顧侯

士隆張刑部璿孫戶部泰皆來訪初七日泊淮安西  
湖風橫力行夜至板閘劉戶部友仁來訪初八日過  
清江廠王工部鏃葉戶部天球來訪風逆宿浦口初  
九日渡河風愈逆挽舟力行至清口驛宿連日風橫  
淮水漲溢瀕河民舍淹沒茫無畔岸旅泊甚惡初十  
日風逆磯水湍悍自清口挽舟力行十五里至湖城  
鎮夜中月色甚清臨江蕭生俊劉生寵偶值曾宿差  
一慰十一日風息行四十里至桃源縣未至五里一  
僕喪買棺殯之驛丞朱良豐城人以醫士朱文來饋  
藥安東縣於此協濟人夫夜幸戶部東山來泊十二

日早發桃源夜乘月行三鼓抵宿遷縣十三日早發宿遷未刻過直河驛復一僕喪倉卒藁葬之夜四鼓至邳州時毒暑蒸鬱二僕暴卒以疫舟人怖甚予鎮以無懼督舟疾馳市香薰解毒諸劑煮而遍飲之幸無恙然觸暑携家可爲永戒也十四日中官進楊梅舟泊邳城下索夫銀橫其州官皆匿同年索戶部遜夫來訪父之知州高巖來乃得數夫行沿途漕舟鱗集時時突冒叫囂行甚艱十五日次房村驛踰呂梁十六日踰徐州洪管洪陳工部輔遣醫餽藥小雨宿洪河口十七日泊徐州漕廳下瀾望巨浸渺然廖工

部維修王戶部國寶陳兵備和皆越江來訪十八日  
午發至茶城野泊十九日風順過境山過來溝驛夜  
抵沛縣二十日風順過沙河驛過孟陽八里灣諸開  
宿南陽閘二十一日過棗林諸閘泊趙村閘煩暑夜  
不能寐五鼓啓閘行至濟寧泊南城驛下總河工侍  
趙公來訪同年李工部希獻及饒郡汪節推希周偶  
值聯舟行二十二日次大長溝獲麟古渡二十三日  
晨雨稍涼朱戶部寅留分署小飲即行晡過袁家口  
聞同年孟望之侍御謫令汶上以公事適至秉燭觴  
語夜分乃別二十四日過安山驛至安平鎮二十五

日次東昌二十六日次臨清原兵備軒部署茅貢劉  
寅蘇輔何文邦皆來訪大熱夜驟風雨二十九日立  
秋風雨發臨清時衛水驟漲黃流湍悍兩河漕舟鱗  
集予所乘舟敝朽而舟卒驚往往觸撞呼號險怖爲  
甚午過渡口驛晡至甲馬營驛七月初一日曉霧過  
梁家庄驛至德州初二日過良店驛午過連窩驛夜  
行次新橋驛予舟不能進李汪二君遣卒秉炬來迎  
初三日過磚河驛過興濟縣晚行未及青縣二里忽  
驟風雨舟不及維繫纜一短柳間危怖達旦至青縣  
李汪二君迎勞相慶如更生初四日過流河驛風逆



備俾舟時時迴湫盤旋不能行晚力行至靜海縣初  
五日五鼓行過楊青驛至天津汪戶部希會邀集初  
六日過丁字沽風逆且憊且行至桃花口宿初七日  
過楊村驛有寇焚劫近村民家予等泊北蔡村不敢  
行更番坐警達旦初八日至河西務翟戶部鵬邀集  
初九日兩宿和合驛初十日搬淺野宿此地多寇十  
一日午至張家灣十四日入都城凡在途三月餘災  
暑鬱蒸憂悸萬狀古謂路難信哉瞻望觀闕於五  
雲之表平生知舊執手契闊之餘於是亦少慰云

西使志

正德十三年秋

冊封諸

宗藩正副使各十三員

予充副使同正使建平伯高霽如廣西靖江府先

是有孝貞皇太后之喪上皆素服避殿輟視朝

及是虞祔畢始從吉典七月三日庚子告廟傳制

晡時鳴鼓駕陞殿方闢門忽大雨如注朝臣立東

角門趑趄不前衛士督趣就班雨益驟庭中皆水拜

興無序未及宣制衛卒昇寶輿出夜深黑喧闐如

沸予出東長安門水深尺餘僕馬皆失與吳仁甫翰

檢徒行至禮部兩靴爲水所浸坐門下脫靴傾水扭

戰復穿濕靴詣禮侍王甌濱先生廂房得裕裘易濕

衣凝齋王少宰同使事亦至取酒各手數杯領冊歸舍已二鼓矣辛丑諸使出城壬寅夜大雨癸卯黎明復雨雨止予始啓行顧官諭九和陸太史子淵柴給事德美邀予同俞國昌大叅餞于崇文門外太史劉應占舒國裳崔來鳳又餞而前泥淖行甚艱晚憇通州察院家人昏黑乃至行李夫舁各不相及比旦勒州夫送之稍稍俱集督磚華工部湘來訪工侍趙公汪侍御景顏各遣卒護送甲辰登舟乙巳城中人來云車駕將北巡召內閣書勅九卿科道官伏左順門下哭留予歎駭久之申刻發舟行二里至長店止

宿建平高公待予於此丙午晨發經和合驛灤縣官  
送夫皂旣而輒逸去夜至河西務王尸部廷珪遲明  
來訪曉雨午晴次楊村驛戊申風順午至天津胡兵  
備被逮去衛官匿索夫不得此地皆戎籍無民差頑  
獷素然管倉郁戶部深來訪已酉小雨發天津二里  
過建平親識苑舉家飲晚晴至楊青驛宿草間多蚊  
撲面瞀膚拂之不去竟夕目不交睫四更時雨啓行  
次奉新驛蒸熱暴雨復霽次長屯宿辛亥五鼓行過  
流河驛驛前湍流洄洑舟盪兀不可定晚行二鼓抵  
興濟縣乾寧驛驛空舍間無一人岸傍人三驛官裏

匿民舍樓中堅壁不出慰諭之乃以空頭印紙闢之  
絕而下久之得夫甲妻組繫之乃始得夫壬子曉行  
午次滄洲宿癸丑晨過磚河驛風順次新橋驛甲寅  
次連窩驛夜分月色如晝乙卯晨過安陵巡司午過  
良店驛晚行將及德州二十里許日沒昏黑捧夫穿  
柳林中蒙密錯忤咫尺不辨有數槩船奕奕下江中  
人語暗寂火光時隱見頗疑有異逾時月出漸高驛  
官秉燭來迓次德州漏下廿刻矣丙辰早食發德州  
晚次故城縣泊梁家莊驛驛疲供億官以印納州去  
夜半漕運都憲臧公舟至胥會乘月起行丁巳風逆

挽舟且行且泊午次鄭家口宿連日煩暑蒸鬱戊午  
小雨食頃雨益橫風色寒凜河流洄洑行甚艱力行  
至甲馬營宿已未過武城訪王純甫吏部過渡口驛  
宿朱家園庚申至臨清部署高君尚賢蕭君廷傑胡  
君大全蕭君孟景兵備李憲副師儒方刑部思道聞  
吉士尚友秦進士祐皆來會此地南北要衝素號難  
治吳守嘉聰鴈門人精悍有幹稱先是傳言車駕  
將幸此州州民攜挈爲避徙計有司亦夙戒供具以  
俟蓋郡邑繹騷比比然壬戌發臨清過青陽縣夜至  
梁家鄉聞癸亥次東昌訪故提學敖公靜之之家

孫江郡學生所居土屋二間詢之許太史思仁云公  
自翰林出副憲皆無貴著屐諸子頗習侈靡公亡家  
遂落予昔爲諸生蒙恩最厚求公墳在城西遠不可  
拜泫然涕下而已晚行三十里周家店宿甲子風逆  
過七級阿城荆門諸閘過安平鎮沿途漕舟及蘇常  
糧艘叢雜行甚艱棘乙丑過安山驛驛屬兗府東平  
州州治距河十二里以老人領夫皂於此接迤夜宿  
靳家口丙寅辰過開河驛野多牛羊馬驢市積魚稻  
過分水廟廟前兩水分流皆就下此地獨隆然高南  
北各十里置閘開啓水泄則舟淺閣民舟壅滯有留

數日者管閘工部主事李瑜自此入南旺湖並湖兩堤垂柳離立陰鬱可翫湖中蒲葦彌望漁罾者網者簦簪者舴艋而遊者艤而泊者蓬倚而飯者歷歷如畫會湖南運殿材巨楠數千株聯筏曳旗蔽流而上楠最碩者圍丈餘長可五十尺誠天地間奇產然此木一株山伐陸輓水運至此費數百金矣丁卯午次濟寧葉工部珩來訪州人馬宣舊仕吾邑簿致仕家居訪之八月朔日戊辰發濟寧河水滄漲閘皆漫徑月河行過魯橋閘宿南陽閘己巳風逆次八里灣遇閔大叅正甫過沙河驛宿廟道口庚午晨過沛縣遙



見江上黃旗 御舟二艘有司宿戒以備巡幸者過  
夾溝驛微雨晚行至境山宿辛未五鼓行六十里天  
明至徐州大水浸民廬舍泊漕運廳下遇同年俞僉  
憲子宜俞云曹太僕汝學同行昨午先發予惜不及  
會寄以詩署州事胡二守堯元管洪陸工部金管倉  
康戶部浩蔣戶部彬徐人趙昌齡馬宗周皆渡江來  
訪午發次呂梁踰洪宿驛下壬申風橫留飲陳工部  
憲觀物亭中午行至新安驛宿癸酉經邳州至直河  
驛宿甲戌過宿遷縣至崔鎮店宿桃源縣吏卒來候  
乙亥過桃源縣風逆晚次清河舟已泊適風少息舟

人謂可渡河鳴櫓換柁下中流如飛河流濫溢無際  
入淮河口驚喜交集雖幸就平妥而實冒險可懼哉  
丙子過清江浦午次淮陰驛都憲叢公臧公總兵顧  
侯丁戶部致祥周刑部鎬薛守鑒來訪予皆報謁過  
同年胡重器僉憲及杜舉人瀾家丁丑發淮陰行廿  
里遇蔡衡仲太史飲舟中風靜過寶應湖水天一色  
空曩無際漁艇上下波中飄浮若飛有巨網列晒如  
林橫洲渚間苑見圖畫過槐角樓鎮風急水湧石岸  
礚礚不可住撐舟行十里許入港乃即安流月波相  
盪夜景澄明夜半至界首驛宿戊寅次高郵遇吳戶

郭仕同泊州守朱良州判楊節來見行廿里遇袁衛  
漕船鄉人競至相慰勞石揮使方留酌因止宿焉夜  
半月出乃行巳卯過邵伯途間禾黍盈疇蕎麥綴花  
甚秀到此始是江南景矣將至揚州十里許河水涸  
運舟商舶叢集且歇且行良久乃得渡泊廣陵驛楊  
侍御朝鳳劉節推一正沙憲副立之安黃門汝礪謝  
生時濟會驛下辛巳如儀真夜分乃至王都帥佐會  
舟中甲申發儀真復從故道至瓜州盤壩乙酉渡江  
入京丙陸侍御行之遺舟送予夜行黎明次丹陽葉  
侍御志來訪夜至毘陵驛丁亥問道如江陰訪故工

部郎中曹公家公宰吾邑有遺愛于進士弘毅之予  
友也發舟出西水門溪港支錯行野田間禾黍蘆叢  
藪藪有聲秋思益清行達旦抵江陰曾令棠張少叅  
允敬蔣進士虞中皆會觴于驛夜行五十里達旦至  
曹公里第拜夫人于堂穀之前數日如蘇城不及會  
予即辭行庚寅晨至無錫遂行晚次滸市辛卯次蘇  
州徐邵伯朝儀顏二守如張邵使朱叅黃景星同年  
袁戶部經皆會甲午小雨泊月舟亭下庵西徐侍讀  
王子貞中舍携酒來穀之亦會予於此聯舟信宿是  
日別晚至吳江乙未過平望夜至嘉興丙申夜至

林丁酉過崇德夜至德新關戊戌撤壩次吳山驛入  
城次武林驛三司諸公來訪九月朔日己亥藩臬郡  
公醪燕都司之後堂杭守留公克全丁二守文範同  
年也邀遊西湖庚子早出湧金門憇洪氏兩山書院  
小飲數行乃登舟緣蘇堤歷孤山岳墳觀大佛寺至  
寶叔塔抵暮而返辛丑出城至浙江驛登舟風順夜  
至富陽壬寅晚至桐廬癸卯過嚴陵祠登之讀湛子  
祠記晚至嚴州鄉里胡少參斯靜朱憲僉克諧二公  
行部於此偕來訪自桐廬至此灘石悍激水清駛見  
底易小舟翌午始行乙巳午至蘭谿遣吏如金華訊

東陽二尹叔丈翌午吏回太守歐陽賜之遣使致書  
餽丙午至龍游是日重九以詩寄楊節推時明丁未  
衡守李遜卿郡齋留集戊申晚泊常山河口詰旦登  
岸飲同年吳侍御德輝察院庚戌晚次玉山王甌濱  
禮待吳仁甫太史使益藩先後偕至會于此辛亥  
留玉山分守少參許公効廉招予飲時久旱谿涸登  
陸如廣信壬子至廣信守巡劉大叅文莊王憲僉崇  
仁駐此偕會王吳二先生於此取道龍虎山赴益予  
往拜閣老費公乃行癸丑次傍羅口甲寅次弋陽宿  
小憩乙卯次貴溪黃太史慎卿夏大行公謹畢工部

汝霖同集時溪水涸淺范尹汝和假予官艦僉議不  
可行夜中風雨淒橫新漲滌汨灘稜俱沒中流自在  
不費推移亦偶然之幸也丁巳晨過安仁晚將至龍  
津廿里野泊戊午早至龍津驛饒郡二守錢汝和署  
餘干縣來致燕餞宿驛下己未至鄔子驛庚申過湖  
至趙家隈辛酉至南昌又五日而抵家

東觀雜志

正德十二年丁丑正月朔早西北風寒勁晝晴是歲  
當天下朝 覲晡時鳴鼓至一更初朝散朝臣吏卒  
相失譟聲如沸有官被踐死午門外初二日有 旨

如南海觀獵在都城南七里召府部大臣科道官甚  
急十三日祀南郊畢畋于南海夜漏下十刻 駕還  
宮翌日慶成宴晡時始宴宴畢月已高矣八月一日  
車駕出次昌平轉通州霸上畋南海十三日還廿  
八日 駕復出九月一日次宣府十一月廿九日長  
至 駕在宣府是日百官詣奉天門行五拜三叩頭  
禮先後雜至班行斷續司儀者不問正德十三年戊  
寅正月朔日 駕在宣府百官行禮如長至皆不賀  
節早西北風薄寒晝晴 駕將還京有 旨頒賜廷  
臣服色初五日司禮監官於左順門唱名頒給內關



二品皆蟒三品皆飛魚四品及翰林學士至侍  
讀皆麒麟五品堂官六科長皆獅翰林史官給事中  
郎中員外郎皆虎計五千疋有奇可謂章服之濫惟  
御史豸初六日 駕次懷來城七日早晦百官出德  
勝門候 駕皆服所賜服色緋金倚殺大帶加帽子  
與劉編修元隆獨青衣同官頗誚讓之晡時 駕至  
文武大臣具彩障製文跪道左捧觴稱賀大雪漏下  
廿刻 駕還宮蓋自去秋八月廿八日至今四閱月  
矣八日大雪九日 駕出齋宮十日大祀畢遂如南  
海觀獵十一日夜二鼓 駕還十二日慶成夜分乃

金史卷一百一十五  
三十一  
宴廿日賜廷臣以南海所獲摩菟廿一日召廷臣觀  
所獲夷物頒賞大臣并科道官銀牌內閣金牌此答  
醵金製綵稱賀者他官未預賀者不及是日申刻  
上單騎馳出德勝門去矣從騎惟四人餘以次追去  
二月十日 太皇太后崩逝十二日聞喪爲始十三  
日百官素服黑帶詣清寧宮門外聽遺詔時 駕在  
宣府是日早晴辰刻忽大雪交下已而復晴巳刻  
駕還未刻宣遺詔畢十四日如前儀十五日成服百  
官各斬衰杖朝夕哭臨三日四月初七日風霾晝翳  
日色白暈無光六月十二日 大行梓宮發引 上

從至昌平廿四日 大行神主祔廟早晴陪祭執事  
官候于廟酉初刻 上至南降輦升階及門忽大雷  
電雨如注燈燭昏滅朝臣衛士奔走避雨班行淆亂  
禮儀廢省聊取終事而已七月初三日傳 制行冊  
封禮予受命如廣西靖江是月 車駕復出明年巳  
卯有寧藩之變

南省志

正德十二年丁丑禮部當會試以考試官請二月六  
日命下大學士戒菴靳公少詹學士東江顧公爲考  
試官予叨與同考是日午刻儀部主事倪本端以幣

至予家初七日陞辭宴禮部入院復宴至公堂乃鎖院入簾八日出初場題曉時主考二公遍視各同考房滅火局吏于房內乃偕詣聚奎堂序坐故事主考上坐同考翰林年深二人前對坐餘皆傍坐是歲二公特請前席四人滕子冲洗馬崔子鍾侍讀陸子淵編修而予亦與焉揭書出題畢即付一刻且刻且印不停手各色匠厨人役釜竈食飲諸物畢具一堂燈燭輝映煬燎薰炙予等坐達旦疲甚用黃紙書進呈題納筒裹以黃袱五鼓擊板揭簾大宗伯至立簾下距內丈餘執事者以筒授宗伯捧而出不交一言禮

部提調官領題出散諸士予等乃揖而退蓋嚴密如此十一日出二場題十四日出三場題皆如之初十日戌時分初場數卷入十一日數十卷入後乃漸多詩房共卷一千四百予房南一百二十五卷後取十四北一百十三卷後取九中四十卷後取三共二百七十八卷共取二十六名十六日午時二場卷入十九日寅時三場卷入閱卷至廿四日畢廿五日各房以所取卷俱呈主考看詳批定名次成草榜午刻知貢舉禮部二公監試二侍御皆入序坐主考同禮部四公上坐二侍御前對坐提調官以墨卷入各同考

先生以所取硃卷對號卷堆積諸箱搜閱甚艱偶一號不對即棄不敢取五經置朱箱五三場取中對號俱同取中者納諸箱主考知貢舉監試官各用封紙署判貯堂中廿六日拆卷填乙榜廿七日填正榜以第十七名爲始填畢又以第六名爲始填至第十六名既乃拆五魁每拆一卷唱名衆共稱爲佳士然後取者乃自慰予謂有司求士之切甚於士之求知於有司也榜成已暮乃宴宴畢退舍束裝京師人以報榜希厚利先賂印匠多印謄錄名紙伺啓闢得紙疾馳去報早則金多亦有惡少伺于途挺仆其人奪紙

以去者夜二鼓門伺者久不勝忿則擲瓦石以入比  
出問者驩譟擁試官馬途塞不得行劉舜臣給事被  
擁逼墮馬深塹中此甚危惡每歲常然亦不能禁也  
三鼓抵舍旦陞見賜宴禮部廿九日謝恩

### 內館志

正德丁丑十一月二十一日予受命教內館初六日  
入館故事詣崇聖堂謁先聖畢升堂內侍諸生行四  
拜禮皆立受司禮諸中貴散居十門各遣學長致刺  
不親往司禮執筆者九人居河濱各親往具贊帕投  
刺帕皆辭是日提督解太監銘具宴其後銘奉使代

者李英執筆代者張準與予先後同事者編脩陸  
子淵劉華甫孫遠宗尹舜弼劉元隆檢討邊汝明

鈴山堂集卷第二十七



鈴山堂集卷第二十八目錄

神道碑銘

墓誌銘

明故光祿大夫太子太保南京兵部尚書贈少保謚端敏秦公神道碑銘

明故太子少保禮部尚書贈太子太保謚莊簡李公墓誌銘

明故資政大夫刑部尚書贈太子太保謚康敏趙公墓誌銘

封通議大夫南京吏部右侍郎洞雲先生張公神道碑銘

都察院右副都御史高公墓誌銘

鈴山堂集卷第二十八

神道碑銘 墓誌銘

明故光祿大夫太子太保南京兵部尚書贈少保謚端敏秦公神道碑銘

嘉靖甲辰正月廿有一日尚書鳳山公薨于第計聞上震悼輟視朝一日下所司議祭葬如例既乃贈少保賜謚端敏制得柩碑神道於是公之子都事沐以文請於予予往與公同仕兩京幾二十年道義交相好也其奚可以辭按狀公諱金字國聲常之無錫人也系出宋國史院編修直龍圖閣少游先生觀之

後先生坐黨籍屢徙道卒葬高郵其子湛倅常州遷葬錫之璨山因家焉遂爲無錫秦氏公生而穎異過人弱冠舉應天鄉薦弘治癸丑登進士第授戶部福建司主事監督倉場糧斛差檢勘順天災傷融敏精幹即斬然穎脫矣總視諸司章奏事無難易慕畫悉當遷貢外郎郎中丁父憂起復除郎正德間宦戚奏乞鹽引每從中報下阻商耗邊鹽法幾壞公當署堅奏格之擢河南按察副使督學政當是時中州之士出公門多顯者初公同邑邵文莊公督學有聲至是人則稱秦邵云陞左叅政分守大梁道劉賊起略河

洛間將薄封丘公設法防禦會衆將宋振提師南下  
因邀與合陣遇賊于陳橋奮擊大破之土人立祠祀  
公陞山東布政右使尋轉左使擢都察院右副都御  
史巡撫湖廣至則屬地方連年大水饑饉公蠲租賑  
濟察罷貪吏上便宜八事再上十事其書在國史以  
文多不載又盜賊數起公擒賀璋廖琪于江討猓童  
于彬桂平叛苗于香爐峯民賴以寧宸濠變起車  
駕南征諸宦寺權要人並緣爲姦橫求有司權勢赫  
壓公抗奏却之諸求少戢在楚餘七年威聲惠流績  
譽大振嘉靖初拜戶部右侍郎改吏部尋轉戶左是

時公攝部篆清理皇莊整飭鹽法申鹽引前禁督漕  
通負蓋公既習知諸務而益殫厥心力補弊興滯然  
然改觀焉錄彬桂諸平賊功廕子錦衣百戶世襲八  
辭乃詔進俸賜白金彩幣拜南京禮部尚書旋改南  
兵部尚書叅贊機務不踰年召爲戶部尚書條奏國  
儲數事今尚循守不變丁亥年六十有一上疏乞歸  
賜璽書乘傳歸命有司歲給興隸朝臣自宰執言  
諫皆以公行能最高年又未艾不宜苟遂其退請切  
公不報公既歸言者不止復起爲南京戶部尚書  
廟工興改工部尚書加太子少保尋加太子太保五

改南京兵部尚書以年七十告謝再疏甚力上知  
不可留溫詔賜歸仍給興廩如初公平平生志務經世  
博極天下之故識達時變而守之以正平居溫溫樂  
易當其職守毫髮不可奪歷兩都五部卿正忠勤一  
節雖退老猶慮切天下事性寡嗜好焚香一室左右  
圖書自娛親課諸孫學業知舊問遺手自勒狀作家  
乘建四代塋域築祠祀淮海先生配以先世有德者  
四人名曰五先生祠以風示族里蓋歸然鉅公長者  
矣爲詩文純雅可誦所著有鳳山詩集撫湖政要安  
楚錄雜著稿橐自奏議諸疏類稿多梓行于世曾祖

諱物初祖諱景薰父諱震皆累贈至太子太保南京  
兵部尚書妣皆一品夫人配鈕氏累封一品夫人子  
二人長泮鄉貢士先卒次泮廕授南京後軍都督府  
都事其葬之月日與子姓媼媾之詳具在太宗伯費  
公誌中茲不著著公之大者以書諸墓上之石而系  
以銘曰

秦肇龍圖有斐令德文實擅宋名廼齊軾用弗究施  
卒死於謫天祐善人懿爾孫子疑疑尚書廼誕厥社  
十世而發振其家祀始仕爲郎令問孔揚允文允武  
何用弗臧教被中土多士斯是河洛之墟大盜披攘



舍爾鳴鐸干戈用張訖誅叛亂封丘之陽爰自旬宜  
以撫荆楚豹服有韜錫以鉞斧熊旂爲章寔總貔虎  
彼蠡有昏負是桀阻三犁逆巢民有寧宇惟是楚人  
式歌以舞 天子召之卿貳卽序敷政優優不吐不  
茹歷正諸曹鞠躬盡瘁未老告休逝其與處廷有興  
論列䟽留公歸而再起勲望益隆仍司邦計復興司  
空保釐舊京官保加崇公再歸矣弗祿康矣耆德壽  
俊民之望矣俄焉長逝乃盡傷矣崇階美謚稽實易  
名高朗令終世莫與倫其倫惟何山甫其人夙夜匪  
懈明哲保身陳詞著德以刻穹珉厥聲鴻鴻百世孔

振

明故太子少保禮部尚書贈太子太保謚莊簡

李公墓誌銘

正德間公爲禮部尚書掌通政司事嘗因天變上勤  
政事戒逸遊重爵賞抑奔競四事不報自是公決意  
求退章六上皆有旨慰留之最後請益力乃報可特  
加太子少保歲給輿皂仍賜勅給驛以歸於時廷中  
稱歎謂有急流勇退之風厥後權奸竊柄逆濠構亂  
乘輿數出大臣恟恟危懼始皆服公之先見云公卧  
家餘二十年年八十有五景泰丙子正月元日爲公

之生其卒

庚子五月五日也計聞

今上皇帝

詔有司給祭葬如例又特贈公太子太保賜諡莊簡  
嗚呼若公之蓋清德懿行鉅公者矣公諱浩字師孟  
姓李氏世爲山西曲沃人以書經舉成化癸卯鄉薦  
明年登進士第初授都水主事管呂梁洪故有役夫  
數千辦磚草銀錢歲若干緡公至悉罷之止令於農  
隙耕辦備用而已署鄰巨豪伺官府短長前任者多  
爲所持擯於公不敢近改戶部主事丁父憂服闋改  
兵部車駕主事陞員外郎奉勅清理畿內諸土田奪  
豪右侵佔者若干頃還之民陞職方郎中爲尚書鈞

陽馬公所稱重委攝諸司章奏 冊封代府溧陽王  
充副使凡所餽贈拒弗受陞通政司右叅議轉左叅  
議持節充正使封晉府雲丘王歷陞左右通政順天  
府尹時久旱䟽論畿甸民所疾苦事當罷行者詔嘉  
納之逆瑾擅政無名需求甚急公一切裁抑數與面  
議可否侃侃不阿聞者頸縮而公不爲沮瑾乃日使  
偵公過失然竟無所得也居二年改通政司使轉兵  
部右侍郎尋轉左兼理武職貼黃嘗攝工部篆修朝  
陽門城垣通州新城公咸督其工乃䟽慎郊圻固封  
守革冗費修戰具數事多見採納以山東盜平陞

一級賜白金彩幣丁繼母許淑人喪賜祭葬給驛以  
歸服闋召拜禮部尚書仍掌通政司事食一品俸賜  
金綺斗牛服色未幾疏乞去位公去後臺諫累疏薦  
公當復用而公已老無意於世矣公器宇魁岸論議  
偉出雖退處丘園每聞朝廷一善政輒喜見顏色篤  
厚倫理有弟客死收恤其孤如已子歲時事先必謹  
著家訓以示子孫雖隆貴自奉無異寒素好學問文  
章雖老不勸所著有南莊稿歸田集藏於家曾祖諱  
思賢祖諱齡考諱禎高密縣丞皆累贈通議大夫兵  
部左侍郎祖妣賀妣鄭皆贈淑人配因氏累封淑人

贈夫人子男四長曰金即弟死撫爲已子者也仕爲  
宜君知縣次鏞河南道監察御史次鑣國子生次鈞  
秦府左長史孫男六承光承德承華承詔承賜承寵  
孫女六曾孫二曾孫女六御史君以辛丑某月日葬  
公于某山之原而奉狀屬書以銘嵩昔在翰林嘗得  
望見公之顏色公得謝歸實賦詩以道公之行者茲  
重以御史君請銘奚以辭銘曰

公生有徵吉夢是占厥夢維何有遺之衡公沒不亡  
去而上昇又曷徵之群鶴降迎維古異人發祥匪偶  
受氣聖精亦孔之厚屹屹李公三晉所

令德在躬祇事 三后荐登八座大受之用罄無不  
可乾崇適囑大阿倒持衆懷睢盱獨炳先幾揚策都  
門脫屣名路鴻飛冥冥弋者何慕既壽而康天歸百  
祥澤不永施厥後乃昌佳城鬱鬱其藏有石勒銘告  
幽以示無極

明故資政大夫刑部尚書贈太子太保謚康敏

趙公墓誌銘

今上即位之初疇咨雋賢登于大僚維時趙公以茂  
德耆望簡在帝心擢南京刑部尚書尋召掌北曹公  
抗顏執憲棘棘無少避雖微有室迂而勁正不回無

何引疾乞休詞極懇切上重違其志詔給驛以歸  
有司具輿皂月廩皆逾恒品陛辭上復製古體詩  
十韻親灑宸翰以賜大臣謝事得賜詩近所未有蓋  
異數云九廟成詔進階榮祿大夫備禮存問公優游  
林下享年八十有四以嘉靖丁酉七月九日卒計聞  
贈太子太保謚康敏遣官營兆恩禮備至可謂榮名  
完節福履令終者矣公諱鑑字克正青州壽光人也  
幼從父隸籍京衛遭母喪免喪爲學宮弟子舉山東  
鄉薦登成化丁未進士授知蕭山縣在縣廉愛有  
惠政去後民思祠之擢監察御史歷視馬政鹽法奉



命按宣大時虜酋火篩犯境朝命平江伯陳銳等帥  
兵討之師久不進公疏劾之又陳方畧甚悉於是兵  
將奮勇連戰皆捷虜爲遁去公爲御史久數推京寺  
要職值逆瑾用事出公知安慶府旋改順德府瑾誅  
乃擢浙江叅政陝西右布政進右副都御史巡撫甘  
肅歲大侵公疏請出內帑賑之及貸富人貨緡易粟  
隨所在給以粥食全活甚衆又令官給牛種勸之使  
耕次年遂大穰又浚渠招屯募民益兵邊務大修又  
却吐蕃復哈密奪地璽書嘉勞改視南京院事復命  
理閩浙鹽法入視院事轉大理卿公於法比素精覈

而宅心平恕爲刑書會其治諸巨種按伏咸得

其情逆濠之變宗室坐繫者衆公疏止坐元惡請釋

其株逮者以故獲全者二百餘人一日待漏直廬朝

士有恃寵徑入託之私者公叱之曰此豈汝寄請地

耶聲色俱厲聞者壯之公素性好士樂善雖面折不

能容人之過而怒過弗藏故人弗怨之臨事決議能

以二三語折衷靡不服學士石熊峯稱之曰清懷慈

實時以爲實紀云祖諱鐸考諱福累贈如公官

氏贈夫人元配劉氏繼許氏贈封皆夫人子男二

岳以蔭歷官都勻知府次岳國子生女四適孔淮

元佑鮑文臣李洞子昔官南京翰林公折行輩禮之  
至是太守君書來屬爲銘曰公之遺命也嗟乎豈以  
予爲知公者哉然不可辭序而系之銘曰

屹屹司冠履方蹈古正色廟堂孰余敢侮人亦有言  
伉直罕容道行志得惟 聖之逢公疏引年翩其解  
組 帝曰嘻哉去我賢輔陸有秉傳廷有賜詩 皇  
眷優常聞者嗟咨卹典責終易名節惠吁嗟良哲可  
式有位

封通議大夫南京吏部右侍郎洞雲先生張公  
神道碑銘

洞雲先生既葬之二年今少宰公貽書其友嵩曰邦  
奇不類少也未嘗一日就外傳大人授之經始學爲  
文擊節擴塞俾知向方有所過僻因事示戒徐誘而  
默喻之及既仕猶然夫蓼莪九我教不與焉若邦奇  
則罔極之痛尚何言維墓碑有文焯德發潛垂世弗  
朽者惟子是託矣高謝非其人蓋閱歲而督命益嚴  
廼考次行錄得先生治身行己之悉而謹志其大者  
序而揭諸墓序曰先生諱時敏字日新姓張氏寧波  
鄞人也聰明沉厚毅然不苟戲笑早入縣庠通易詩  
二經遠近爭迎以爲師慕聞來學造就日衆少宰公

親承指授陶鎔淬濯遂大成其器文聲重館閣而先生屢試有司輒弗偶其內修之行既足稱于家邦而世之有權力聲氣者知先生莫能深故卒以窮始先生以爲君子之學要自期於古人立身如程明道濟世如韓魏公范文正公避俗如陶靖節自約如馬少游恒舉以爲法讀書匪尚博識經史要語切於心身者書諸楹壁而時觀之允迪之蓋先生所自志者如此其於世俗得喪歡戚不以屑意也先生弘裕以容衆矜嚴以正物全已以守貞純儉以存戒謂鈍爲利謂拙爲巧謂朴爲華凡先生之行已居鄉及所以淑

其子者皆出於長厚誠恕足以平怨釋欲革檢亡伎  
消鄙敦薄挽末俗進之古可謂淑人君子者矣先生  
博極羣藝陰陽星曆山經地志姑布子卿之術靡不  
通曉然鮮言之爲詩冲澹和平所著洞雲稿藏于家  
初以少宰公貴封翰林院檢討繼加四品風憲服郊  
恩進封通議大夫南京吏部右侍郎先生素志經濟  
及受封則絕意世故日與親舊觴詠自適於溪山雲  
月之間享榮養者二十有五年年七十有二嘉靖辛  
卯二月甲申以疾卒上聞賜諭祭命有司營葬事  
乃以是年十二月丙申葬于蕪港祖塋之次祖諱純

父諱忱贈如先生官配沈氏封孺人進封淑人先生  
二邦彥惠而蚤卒次即少宰公次邦韶邦禮側室董  
出女二學生裘穆徐楸壻也孫男子中子釋子兆子  
望嵩聞諸古之士學成而道德明秀則進爲公卿大  
夫暨百官之選其後國論不及乎里巷之隱士之修  
已者恒詘於程試之文顧以先生之材與行而不見  
知遇不克少施于時則爲善者何以勉焉雖然乃有  
今少宰公有道而文爲時名卿嗚呼蘊必發其在茲  
乎序而系之銘其詞曰

崑岡之璞瑜瑾內全瑩瑩精氣浮于山川徂徠之松

礫柯千尺凌傲雪霜其姿鬱鬱胡不珪璫薦之清廟  
胡不棟梁于彼鴻構猗嗟先生行古道方材宏莫用  
匿耀含章惟其不有以惠後昆是生少宰實大其門  
過庭受誨匪色匪言如彼蒙泉弗汨其源渾渾其積  
蔚蔚其宣文世宗之行世儀之惟其身教式穀似之  
天曹嚴嚴百辟具瞻甄別賢類以贊化元猗嗟先生  
迹晦道光爲不自躬厥彌長榮莫與夷眉壽多祉  
湛恩洪龐未見其涖刻詩墓門以詔來禩

通議大夫都察院右副都御史高公墓誌銘

嘉靖己丑三月一日都察院右副都御史仰峯先生



高公卒于家惟國家於大臣之終具有卹典於是有  
詔命有司營葬仍命官諭祭如制是年十月某日葬  
公千里澤埶子祉貽書京師以公遺言謂嵩使誌諸  
墓始公識嵩於諸生中薦寵之頃被召國學公送之  
彬江之許執手語曰吾老矣不及兄子墓石之文惟  
子是託也嗟乎予曷可以不銘公哉予又曷忍銘公  
也哉謹按公諱琬字德資成化戊子占江西鄉試戊  
戌登進士歷知松陽上海二縣召爲南京貴州道監  
察御史陞松江知府陝西湖廣叅政右布政浙江左  
布政已而拜右副都御史撫治鄖陽公器貌端重爲

政矜嚴持大體曉達民事慎飭名檢所至舉其職而  
上海松江之政尤稱最上海松屬邑也地大賦繁公  
至減官糧加耗奏以餘糧編銀顧夫民稱省便官稅  
徵解歲有羨餘數百金前政者例受之公初不入于  
心則斥以建學舍齋閣廨宇館傳之敝圯者鋤抑豪  
強發擿姦伏屢辨疑獄終其任無敢干以私聞父喪  
即日奔歸民懷慕齋餽追至其家一峻拒之爲御史  
風裁凜峻出按蜀戎籍持平不苛稽審有法衆號得  
體適松守缺松人咸願得公爲守語聞吏部以公往  
蓋公前在上海威信既孚於民又熟其利病反爲

益邁往蹕厲几所興革弛張舉措務建經乂長利期  
無遺便乃已用文學飭吏治考大成之樂間詣學官  
飲射讀法率學官弟子親爲講說課試高等者慰寵  
之飭陸宣公周文襄之祠表忠節貞孝百廢具興松  
故饒財俗尚侈靡公身爲儉約先之食不重肉客至  
豆觴魚鱸果脯一飯而已禁饗燕俳優雜劇不一陳  
於前考公所爲庶幾君子德義之風矣撫卹時劇寇  
劉七猖獗連河鄧襄蜀數州患之都御史彭公澤專  
總制公受勅調漢土兵併力追勦計畫勞勩渠黨就  
獲璽書獎勵有襲衣白金之賜衆方多其功顧爲言

者所抑得旨召公將別用之公還過家即卧不復仕  
矣有司議平賊功猶以白金彩幣即其家賜焉今  
上登極推恩廷臣公雖家卧援比以請詔賜誥進階  
通議大夫祖諱原亨考連江丞諱仕忠皆贈通議大  
夫都察院右副都御史祖妣某氏妣胡氏皆贈淑人  
蓋累數云家居十有五年年八十有五履行重一時  
前後部使數致粟帛禮於其廬高氏之先出安成之  
簞橋有諱隆者來家宜春與中表劉以文厚善以文  
無嗣隆以次子原亨嗣之遂冒劉姓即公之祖也公  
三世皆仍姓劉嘉靖壬午社領鄉薦會試禮部始以

明懷姓高金為理伯兄琦弟璆友愛甚  
篤有田卒悉推與之而別創以付社等從兄孟寬客  
遊齊湘卒遺孤禧公撫之如子宦邸與社就外傳長  
娶以室服用惟均禧今聽選監生其他親族願公賑  
贍殯厝尤衆願自公視之皆常行不及悉書也公元  
配戚氏繼王氏皆贈封淑人子男四長即社次陰陽  
訓科祚次祐蚤卒次祿女適都御史張公鳳子汝功  
指揮使石公方次子宮俱國學生孫一人曰元銘曰  
抑抑高公維行之持螯彼玉雪弗受磷緇爬梳濯濡  
威惠並施厥政在民既去而思位方日融器也大受

退處而休厥用弗究公雖告休受寵無已金幣誥書  
即命于第考終大耋福履具完 皇有異恩賁于九  
原納銘昭德以告弗諼